



18

Niining Leksyona Matun-an Mo Kini

Ang Pagdakop Kang Jesus

Si Jesus Atubangan ni Anas

Si Jesus Gilimod ni Pedro

Si Jesus Giusisa sa Labawng Sacerdote

Si Jesus Gilimod Pag-usab ni Pedro

Si Jesus Sa Atubangan ni Pilato

Si Jesus Gihukman nga Patyon

ANG PAGDAKOP KANG JESUS (Basaha ang Juan 18:1-11)



Si Judas mao ang nag-una sa mga sundalo nga modakop kang Jesus. Nganong nabuhat man niya kining maong dakung pagkadautan? Kon ang usa ka tawo magapalayo na gani gikan kang Cristo, si Satanas magagahum kaniya.

Basaha pag-usab ang mga bersikulo gikan sa 4 ngadto sa 6. Sa dihang gipakita ni Jesus ang diotay lang kaayo Niyang gahum, ang mga sundalo nangapukan ngadto sa yuta. Dili sila makadakop kang Jesus gawas kon motugot Siya. Apan wala mosulay si Jesus sa pag-ikyas. Nasayud Siya nga plano sa Dios alang Kaniya nga Siya magpakamatay alang sa atong mga sala.

Gisultihan ni Jesus ang mga sundalo nga ang mga kauban Niya tugotan nga moikyas, tungod kay Siya man lamang ang gipangita sa mga sundalo, Bisan pa sa hapit na si Jesus mamatay, naghunahuna gihapon Siya sa mga Iya nga dili unta sila magaantus ingon sa Iyang pagaantuson.

Andam si Pedro sa pagpakig-away alang sa Ginoo. Gani, mihulbot siya sa iyang espada ug giputol ang dalunggan sa sulugoon sa labawng sacerdote. Miingon si Lucas nga giayo ni Jesus

kining maong sulugoon. Mao tingali ni ang hinungdan nganong wala ra siloti si Pedro sa mga sundalo.

Buhata Kini

1. Unsa may atong makat-onan nga pagtulon-an mahitungod sa pagbudhi ni Judas kang Jesus didto sa tanaman?
 - . . . a) Kinahanglan dili kita maga-ampo sa tanaman.
 - . . . b) Magagahum si Satanas kanato kon mopalayo kita gikan kang Cristo.
 - . . . c) Ang mga sundalo kinahanglan dili tugotan sa pagtambong sa mga katiguman sa pag-ampo.

2. Nganong wala man si Jesus moikyas o magapanalipod sa Iyang kaugalingon sa dihang miabot ang mga sundalo aron pagdakop Kaniya?
 - . . . a) Nasayud Siya nga panahon na sa Dios nga mamatay Siya.
 - . . . b) Nagpaabot Siya nga ang Iyang mga tinun-an magapanalipod Kaniya.
 - . . . c) Wala Siyay gahum batok sa mga sundalo.

3. Unsa may gibuhat ni Pedro didto sa tanaman?
 - . . . a) Nag-ampo siya tibook gabii.
 - . . . b) Mitawag siyag kalayo gikan sa langit.
 - . . . c) Giputol Niya ang dalunggan sa sulugoon sa labawng sacerdote.

SI JESUS ATUBANGAN NI ANAS**(Basaha ang Juan 18:12-14)**

Si Anas ug ang iyang umagad nga si Caifas nakahupot sa katungdanan sa pagkalabawng sacerdote. Nagkasabut sila sa pagpatay kang Jesus. Gibutang butangan Siya nga usa ka pangulo nga buot moalsa batok sa kagamhanan. Miingon ang mga katawhan nga kondili patyon si Jesus, ang kagamhanan nga Romanhon mosugo sa mga kasundalohan sa pagpatay sa mga Judeo. Dili kini tinuod. Apan paagi lang kini nila aron nga ang ubang mga kadagkuan sa relihiyon moapil sa pagtinguha alang sa kamatayon ni Jesus.

Miingon si Caifas nga maayo pa nga dunay usa nga mamatay kay sa ang tanang katawhan mangamatay. Wala siya masayud nga nakasulti siyag dakung kamatuoran mahitungod sa kamatayon ni Jesus. Si Jesus mao ang atong halad aron dili kita mahiagum sa silot.

Mahibulong tingali ikaw ngano nga si Jesus dili makaluwas kanato kon dili Siya magpakamatay. Ang Dios maayo. Gikaligutgutan Niya ang sala ug ang tanang pagkadautan. Mao nga kadtong nanagbuhat sa sala mahalayo gayud gikan sa Dios. Apan tungod kay ang tanan kinabulhi ug kalipay nagagikan man sa Dios, kadtong mahalayo sa Dios mamatay gayud.

Gitudloan kita sa Dios unsa ka ngil-ad ang sala, ug nganong ang sala nagakinahanglan ug kamatayon pinaagi sa paghalad sa dugo aron kini mapasaylo. Ang mga karnero, mga kanding,

ug mga baka, ginahalad aron pagkuha sa dapit sa makasasala.

Mga Hebreohanon 9:22. Ubos sa kasugoan hapit ang tanang butang pagahinloan ug dugo, gawas sa pag-ula ug dugo walay mahimong pasaylo sa mga sala.

Kining paghalad sa mga mananap gikinahanglan pagabalikbalikon tungod kay dili man kini makakuha gayud sa sala. Mga temporaryo lamang sila nga mga tulumahon hangtud ang Dios magahalad sa kaugalingon Niyang Anak alang kanato. Si Jesus mohatag sa kaugalingon Niyang dugo alang kanato. Kon duna pa untay laing makaluwas kanato, dili unta ang Dios motugot nga ang Iyang bugtong Anak pagapatyon alang kanato.

Buhata Kini

4. Nganong kinahanglan pa man nga magpakamatay si Jesus aron pagluwas kanato gikan sa atong mga sala?
 - . . . a) Tungod kay pinaagi lamang sa pagpaagas sa Iyang dugo mapasaylo ang atong mga sala sa hingpit gayud.
 - . . . b) Tungod kay mangamatay man kita. Ug nagpakamatay si Jesus aron pagpakita kanato nga dili angay nga mahadlok kita sa kamatayon.
 - . . . c) Tungod kay buot Siyang magatudlo nga ang halad alang sa sala kinahanglan pagabalikbalikon.

SI JESUS GILIMOD NI PEDRO (Basaha ang Juan 18:15-18)

Ang lain pang usa ka tinun-an nga gihisgutan dinhi mao si Juan nga nagsulat niini nga ebanghelyo. Wala niya tagoi ang kamatuoran nga siya usa ka tinun-an ni Jesus ug wala siya mahiagum sa kasamok. Apan si Pedro nga nagtoo nga siya andam kanunay sa pagsulti alang kang Jesus, nahadlok hinoon. Miingon siya nga dili Siya tinun-an ni Jesus.

Sayon ang pagpahibalo sa mga katawhan nga ikaw Cristohanon kon kauban mo ang ubang mga Cristohanon. Apan dili kaayo sayon kon ang tanan nga nagalibot pulos mga kaaway ni Jesus. Unsa may imong buhaton kon ikaw pa?

Mateo 10:32,33. Busa, bisan kinsa kadtong moila kanako sa atubagansa mga tawo, ilhon ko usab siya sa atubangan sa akong Amahan nga anaa sa langit. Apan bisan kinsa kadtong dili moila kanako sa atubangan sa mga tawo, dili ko usab siya ilhon sa atubangan sa akong Amahan nga anaa sa langit.

Buhata Kini

5. Naglisod ba ikaw sa pagpahibalo sa ubang katawhan nga ikaw usa ka Cristohanon?
Nahadlok ba ikaw nga ilang pagalutoson? Pag-ampo nga tagaan ka ug kaisug sa Dios.

SI JESUS GIUSISA SA LABAWNG SACERDOTE**(Basaha ang Juang 18:19-24)**

Nakahupot si Anas sa katungdanan sa labawng sacerdote, mao nga gitawag usab siya dinhi nga sacerdote bisan tuod nga niining tungora si Caifas na ang nagahupot sa maong katungdanan. Gisulayan ni Anas si Jesus sa pagpatubag ug mga butang nga mahimong gamiton nila batok ra usab Kaniya sa paghukom apan wala motubag si Jesus sa iyang mga pangutana.

Gidala si Jesus sa mga sundalo ngadto sa balay ni Caifas. Didto gipasakaan Siyag sumbong atubangan sa hukmanan sa relihiyon nga gitawag ug Sanhedrin. Kining maong paghusay wala mahisubay sa balaod nila tungod kay gihimo man kini sa tago sa panahon sa pagtawag sa mga saksi nga makasulti dapit kang Jesus. Ang kadaghanan sa mga sakop sa Sanhedrin nakahukom nang daan nga si Jesus kinahanglan pagasilotan sa kamatayon. Naghimo silag paghusay aron madala nila si Jesus sa atubangan ni Pilato nga dunay inandam nga sumbong.

Buhata Kini

6. Nganong nangutana man si Anas kang Jesus?
- . . . a) Aron makakat-on sa mgapagtulonan ni Jesus.
 - . . . b) Aron masayud ug dugang mahitungod kang Jesus.
 - . . . c) Aron pagpangitag tubag nga gamiton batok ra usab Kaniya.

SI JESUS GILIMOD PAG-USAB NI PEDRO (Basaha ang Juan 18:25-27)

Makatulo si Pedro gipangutana kon sumusunod ba siya ni Jesus o dili ba, ug makatulo usab ni Pedro gilimod ang iyang Ginoo. Dihay manok nga mituktuga-ok sumala gayud sa gisulti ni Jesus. Sa dihang mitan -aw si Jesus ka niya, nakaamgo siya sa iyang pag pakyas sa iyang Agalon. Midagan siya padulong sa gawas nga naghilak ug nasubo tungod sa iyang nabuhat.



Buhata Kini

7. Unsa may gibuhat ni Pedro didto sa balay sa labawng sacerdote?
- . . . a) Giputol niya ang dalunggan sa solugoon sa labawng sacerdote.
 - . . . b) Gilimod niya ang iyang Ginoo makatulo.
 - . . . c) Misulti siya nga mosunod siya sa iyang Ginoo sa tanang panahon.

SI JESUS SA ATUBANGAN NI PILATO (Basaha ang Juan 18:28-38)

Ang Sanhedrin dili makapakanaug ug hukom sa kamatayon, mao nga ilang gidala si Jesus ngadto sa Romanhon nga gobernador nga mao si Pilato. Gipasanginlan nila si Jesus nga nagsulay kuno sa pagtukod sa Iyang kaugalingong gingharian. Usa kini ka sala nga mahimong silotan sa kamatayon.

Wala mosulay si Jesus sa pagpanalipod sa Iyang kaugalingon batok niining sayop nga sumbong. Miingon Siya ngadto kang Pilato nga Siya usa ka Hari apan ang Iyang gingharian wala dinhi niining kalibutana. Ang Iyang gingharian maoy usa ka espirituhanong gingharian diha sa mga kinabuhi sa mga katawhan nga nanagdawat Kaniya.

Buhata Kini

8. Sa dihang nangutana si Pilato kang Jesus kon Siya usa ba ka hari, unsa may gitubag ni Jesus?
- . . . a) "Dili, dili tinuod ang ilang sumbong."
 - . . . b) "Ang akong pagkahari dili iya niining kalibutana"
 - . . . c) "Ang akong gingharian labaw pa ka daku kay sa Imperyo sa Roma."
9. Imo na bang nadawat si Jesus ingon nga hari sa imong kinabuhi?

SI JESUS GIHUKMAN NGA PATYON

(Basaha ang Juan 18:38-40)

Nangutana si Pilato kang Jesus sa daghang mga pangutanan apan wala siyay nakit-ang hinungdan nga tungod niini pagapatyon si Jesus. Gisultihan ni Pilato ang mga katawhan niini apan misamot hinoon pagsinggit ang mga katawhan nga ipapatay si Jesus. Gipapili ni Pilato ang mga katawhan kon asa ang ilang palabihon nga ipagawas, si Jesus ba kon si Barrabas nga usa ka tulisan. Gipili sa mga katawhan si Barrabas. Ang mga katawhan karon nagapili sa sala ug sa mga kahilayan inay sa kang Jesus. Unsa man ang imong pagpili? Unsa may imong buhaton kang Jesus.

Buhata Kini

10. Unsa man ang hukom ni Pilato?

- . . . a) Miingon siya nga nakasala si Jesus ug kinahanglang mamatay.
- . . . b) Buhian niya si Jesus tungod kay panahon man kadto sa Pasko sa mga Judio.
- . . . c) Prisohon niya si Jesus uban kang Barrabas.

11. Itandi ang imong mga tubag sa hustong mga tubag nga anaa sa katapusan niining leksyona.

12. Sulati ang imong rekord sa estudyante alang sa ika-18 nga leksyon.

Mga Tubag sa Ika-18 nga Leksyon

Kon duna kay 7 ngadto sa 8 ka mga hustong tubag, markahi ang imong grado ug labing maayo; kon 6, markahi ug maayo; kon 5, kasarangan. Kon kubos sa 5 ang imong hustong mga tubag, basaha pag-usab kining leksyona.

1. b) Magagahum si Satanas kanato kon mopalayo kita gikan kang Cristo.
2. a) Nasayud Siya nga panahon na sa Dios nga mamatay Siya.
3. c) Giputol niya ang dalunggan sa sulogoon sa labawng sacerdote.
4. a) Tungod kay pinaagi lamang sa pagpaagas sa Iyang dugo mapasaylo ang atong mga sala sa hingpit gayud.
6. c) Aron pagpangitag tubag nga gamiton batok ra usab Kaniya.
7. b) Gilimod niya ang iyang Ginoo makatulo.
8. b) "Ang akong pagkahari dili iya niining kalibutana."
10. b) Buhian niya si Jesus tungod kay panahon man kadto sa Pasko sa mga Judio.

Gidaghanon sa Hustong mga Tubag _____

Grado. _____